

太平寰宇記

第四十八冊

太平軍年記

卷四十八

太平寰宇記卷之一百九十四

四夷二十三

北狄六

軻比能

宇文莫槐

徒阿段

慕容氏

高車

稽胡

突厥上

軻比能

軻比能本小種鮮卑以勇健斷法平端不貪財物眾
推以爲大人部落近塞自袁紹據河北中國人多
亡叛歸之敎作兵器鎧楯頗學文字故其勒御部

大平集年譜 卷之一 百九十四
眾擬則中國出入弋獵建旂麾以鼓節爲進退比
能眾遂强盛控弦十餘萬騎餘部大人皆敬憚之
然猶未能及檀石槐也至青龍元年比能誘說步
度根使叛并州其後幽州刺史王雄遣勇士韓龍
刺殺比能更立其弟素利彌加厥機皆爲大人在
遼西右北平漁陽塞外道遠初不爲邊患然其種
眾多于比能也其後諸子孫爭立國眾離散諸部
大人慕容拓跋更盛焉

四至

在遼西右北平漁陽塞中以道遠不知里數

土俗物產

與鮮卑同

宇文莫槐

宇文莫槐出于遼東塞外世爲東部大人

晉書謂之鮮卑魏書

云其先匈奴南單子之遠屬又按後周書云出自炎帝爲黃帝所滅子孫逃漠北鮮卑奉以爲主今考諸家所說其後妖孫莫槐立

鹿胡罪切

部眾强盛自

稱單于塞外諸部咸畏憚之先得玉璽三紐自言

爲天所相俗謂天曰宇故自號宇文至孫乞得龜

爲慕容廆所敗別部人逸豆歸殺乞得龜而自立

又爲慕容皝所敗

皝音晃

皝徙其部五千餘落于昌

黎自是滅散矣後周宇文氏源出于此

土俗

人皆翦髮而留其頂上以爲首飾長過數寸則截之令短婦人被長褐及足而無裳言語並與鮮卑同

徒阿段

徒阿段一名曰陸眷出于遼西因亂被賣爲漁陽烏丸大人庫辱官家奴諸大人會集幽州皆持唾壺惟庫辱官獨無乃唾曰陸眷口中日陸眷因咽之西向拜曰願使主之智慧祿相盡移入我腹中其

後漁陽大饑庫辱官以日陸眷爲健使將人眾詣
遼西逐食招誘亡叛遂至強盛日陸眷死後至姪
務勿塵據有遼西之地而臣于晉其所統三萬餘
家控弦四五萬騎封勿塵爲遼西公假大單于印
綬就陸眷立

務勿塵之子

與弟匹磾

都泥切

從弟末波等

率騎圍石勒于襄國爲勒所破擒末波而捨之就
陸眷遂攝軍而還歸於遼西就陸眷死末波自稱
幽州刺史末波死國人立日陸眷弟護遼爲主後
爲慕容皝所殺其弟鬱蘭犇石季龍以所徙鮮卑
五千人配之使屯令支

今北平郡盧龍縣卽其地也

及冉閔之

亂段龕

龕鬱蘭之子也龕音堪

率眾南移遂據齊地慕容儁

使弟恪帥眾伐龕于廣固

今北海郡城

執龕殺之坑其

徒三千餘人遂滅

慕容氏

慕容氏亦東胡之後別部鮮卑也

晉史云有熊氏之苗裔因山以爲號

魏初渠帥有莫護跋率諸部入居遼西後從司馬

懿討公孫淵有功拜率義王始建國棘城之北

今柳

城郡之北時燕代多冠步搖冠護跋見而好之乃斂髮

襲冠諸部因呼之爲步搖其後音訛遂爲慕容焉

或云慕二儀之德繼三光之容遂以慕容爲氏至

孫涉歸魏封爲鮮卑單于遷居遼東于是漸慕華

夏之風矣涉歸有子二人長曰吐谷渾西遷河隍

之間今安鄉郡西平縣也次曰廆有命世才略晉太康十年

又遷于徒河之青山即今柳城之郡界也廆以大棘城即帝

顓頊之墟元康四年乃移居之教以農桑法制同

于中國永嘉初廆自稱鮮卑大單于因晉亂招撫

華夷刑政修明流亡歸之甚眾乃立郡以統之冀

州人爲冀陽郡荆河州人爲成州郡青州人爲營

邱郡并州人爲唐國郡徵辟儒生以爲參佐而奉

晉室朝貢臣禮不闕至號廆之子雄毅多權略日以

强勝遂自稱燕王遣使于東晉請受朝命許之後
遷都于柳城儁暉卽其子孫也

後國號燕具
晉史載記

高車

高車蓋古赤狄之種也初號爲狄歷北方以爲敕勒
諸夏以爲高車丁零焉其語略與匈奴同而時有
小異或曰其先匈奴之甥也其種有狄氏表紇氏
斛律氏解批氏護骨氏異其斤氏其俗云匈奴單
于生二女其姿容甚美單于曰此女安可配人將
以與天乃于國北無人之地築高臺置二女于其
上曰請天自迎之乃有一老狼晝夜守臺嗥呼因

穿臺下爲穴經時不去其小女曰吾父以我與天
而今狼來或是神物將下就之其姊大驚曰此是
畜生無乃辱父母乎妹不從乃下爲狼妻而產子
後遂滋繁成國故其人好引聲長歌有似狼嗥本
無都統大帥當種各有君長爲性麤猛黨類同心
至于寇難翕然相依鬪無行陣頭別衝突乍出乍
入不能堅戰後徙之鹿渾海西北百餘里部落强
大常與蠕蠕爲敵亦每侵盜于魏後魏道武帝度
弱水西行至鹿渾海襲破之復討餘種于狼山又
大破之入于駁音剝髡水西北狗略其部破其雜種

三十餘落虜獲男女五萬口馬牛羊百餘萬高車
二十餘萬乘而還其後太武帝征蠕蠕還至漠南
聞高車東部在已尼陂相去千餘里遣騎襲破之
降者數十萬皆徙置漠南千里之地後又相率北
叛高車之族又有十二姓一曰泣伏利氏二曰吐
盧氏三曰乙旃氏四曰大連氏五曰窟賀氏六曰
達薄干氏七曰阿崙氏八曰莫允氏九曰俟分氏
十曰副伏羅氏十一曰乞袁氏十二曰又叔沛氏
先是副伏羅部爲蠕蠕所役屬魏孝文帝太和十
一年蠕蠕主豆崙犯塞其酋阿伏至羅固諫不從

怒率所部之眾西叛阿伏至羅死弟子彌俄突立遣使朝貢宣武詔之曰蠕蠕嚙噓與吐谷渾所以交通者皆路由高昌國今交河郡掎角相接今高昌內附遣使迎引蠕蠕既與吐谷渾路絕奸勢亦危于卿彼蕃便有所益行途經由宜相供俟不得令羣小擁塞王人彌俄突尋與蠕蠕主伏圖戰于蒲類海北大敗明帝初彌俄突又被蠕蠕主醜奴大敗殺之弟越居靜帝時爲兄子比適所殺越居子去賓自蠕蠕奔後魏封爲高車王拜肆州刺史死于鄴至隋有突厥失國卽後魏之高車國焉

土俗物產

其俗蹲踞褻瀆無所避忌婚姻用牛馬納聘以多
爲榮俗無穀稻不作酒迎嬭之日男女相將持馬
酪熟肉節解主人延賓亦無行位穹廬前叢坐飲
宴終日復留其宿明日將婦歸旣而夫黨還入其
家馬羣極取良馬俗不潔淨喜致震霆每震則叫
呼射天而棄之移去每歲秋馬肥復相率集于震
所埋殺羊然火拔刀女巫祝說音稅似如中國祓除
而羣隊馳馬旋繞百匝乃止人持一束柳音夷回
豎之以乳酪灌焉婦人以皮裹羊骸戴之首上縈

屈髮髻而綴之有似軒冕其死亡葬送掘地作坎
坐屍于中張臂引弓佩刀挾稍無異于生而露坎
不掩走馬繞旋多者數百匝男女無大小皆集會
之其遷徙隨水草衣皮食肉牛羊畜產皆與蠕蠕
同唯車輪高大輻數至多

稽胡

稽胡一曰步落稽蓋晉時匈奴別種劉元海五部之

苗裔也或云山戎赤狄之後自離石以西

離石今昌化郡

安定以東

今安定郡是也

方七八百里居山谷閒種落繁

熾雖分統郡縣列于編戶然輕其徭賦有異齊人

山谷阻深者未盡役屬而兇悍恃險數爲寇亂後

魏明帝孝昌中有劉蠡升者居雲陽谷

今縣界

自稱

天子立年號署百官後爲齊神武所滅後周明帝

武成初延州稽胡郝阿保郝狼皮

延州卽今延安郡

率其

種人附於齊氏并與其別部劉素德爲影響周柱

國豆盧寧督諸軍與延州刺史高琳擊破之建德

五年武帝敗齊師于晉州

今平陽郡

乘勝逐北齊人所

棄甲仗未暇收歛稽胡乘閒竊出並盜而有之乃

立蠡升孫沒鐸爲主號聖武皇帝後齊王憲爲行

軍元帥討破之自是寇盜頗息矣

四至

離石以西安定以東始爲所居約地方七八百里山谷之間種落繁熾其後漸散漫處于邠晉鄜延地每爲邊患周齊之代迭攻而滅

土俗物產

其俗土著亦知種田地少桑蠶多衣麻布其丈夫服及死亡殯葬與中夏略同婦人多貫珠貝以爲耳頸飾又與華人錯居其渠帥頗識文字然語類夷狄因譚乃通蹲踞無禮貪而忍害俗好姪穢

突厥上